

**«Ս. ՍԱՀԱԿ - Ս. ՄԵՍՐՈՊ» ՇՔԱՆՇԱՆ ՀԱՅԱՍՏԱՆԻ  
ԱՄԵՐԻԿԱՆ ՀԱՄԱԼՍԱՐԱՆԻ ՆԱԽԱԳԱՀ  
ԴՈԿՏ. ՀԱՐՈՒԹՅՈՒՆ ԱՐՄԵՆՅԱՆԻՆ**

Օգոստոսի 18-ին Մայր Աթոռ Սուրբ Էջմիածնում Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսը «Ս. Սահակ - Ս. Մեսրոպ» շքանշան հանձնեց Հայաստանի Ամերիկյան Համալսարանի նախագահ դոկտոր Հարություն Արմենյանին՝ գիտամանկավարժական և հասարակական արդյունաշատ գործունեության համար:

Շքանշանի հանձնման հանդիսությունը բացեց Մայր Աթոռ Սուրբ Էջմիածնի Արխիվի տնօրեն Տ. Ասողիկ քին. Կարապետյանը: Մեծարյալի կյանքի ուղուն մանրամասնորեն անդրադարձավ Հայաստանի Ամերիկյան Համալսարանի վարչական գծով տնօրեն Անահիտ Օրդյանը:

Այնուհետև «Էջ Միածինն ի Հօրե» շարականի երգեցողության ներքո ներս բերվեց Հայրապետական Սրբատառ Կոնդակը, որն ընթերցեց Մայր Աթոռ Սուրբ Էջմիածնի միաբան, Մայր Տաճարի լուսարարապետ Տ. Արարատ եպս. Գալթագճյանը:

Տիար Հարություն Արմենյանին տրված կոնդակում ի մասնավորի ասվում է. *«Տասնամյակներ շարունակ Դուք անխոնջ նվիրումով ծառայել եք առողջապահության բնագավառում՝ բազում պատասխանատու պաշտոններ հանձն առնելով Լիբանանի, Հայաստանի, Օմանի, Գերմանիայի, Իրաքի և այլ երկրների բժշկական հաստատություններում ու կրթօջախներում: Ձեր հեղինակած բազմաթիվ գիտական աշխատություններ՝ նվիրված առողջապահական հրատապ խնդիրների ուսումնասիրությանը, մեծ ընդունելության ու գնահատանքի են արժանացել մասնագետների կողմից և հրատարակվել տարբեր երկրներում: Ձեր բարձր հեղինակության վկայություններն են Ձեր մասնակցությունը բազմաթիվ գիտաժողովներին, անդամակցությունը բժշկական ասպարեզի միջազգային հեղինակավոր կազմակերպություններին, հայրենական և միջազգային բարձր պարգևները, կոչումներն ու ակադեմիական մրցանակները, որոնք արժանի մատուցումն են Ձեր գիտական արդյունաշատ գործունեությանը: Անհոգնաբեկ ու նվիրյալ աշխատանքով արձանագրված Ձեր հաջողությունները ճանաչում են բերում նաև Հայրենի մեր Երկրին ու բարեպաշտ ժողովրդին:*

*... Իբրև Համալսարանի նախագահ՝ Դուք աննվազ եռանդով ներդնում եք Ձեր հարուստ փորձառությունն ու կարողությունները, որպեսզի համալսարանը շարունակի կրթել ու պատրաստել բարձրակարգ մասնագետներ, ովքեր իրենց հոգու և մտքի արարումներով կարևոր մասնակցություն պիտի բերեն մեր Հայրենիքի շենացմանն ու բարգավաճմանը՝ բարձր պահելով հայ գիտության վարկն ու համարումը: Ձեր գործունեությունը բարի օրինակ է կրթօջախի ուսանողության համար՝*

անդուլ ու անհոգնաբեկ աշխատանքով ձգտելու հաջողությունների և ծառայելու մեր Երկրում գիտության առաջընթացին:

Բազում անգամներ Մենք առիթ ունեցել ենք նաև դրսևորված տեսնել Առաքելական մեր Սուրբ Եկեղեցու և Մայր Աթոռ Սուրբ Էջմիածնի հանդեպ Ձեր սերն ու անխախտ հավատարմությունը, որ կրում եք Ձեր հոգում՝ իբրև արժանի զավակ լիբանանահայ համայնքի»:

Կոնդակի ընթերցումից հետո Նորին Սրբությունը մեծարյալի կուրծքը զարդարեց «Ս. Սահակ - Ս. Մեսրոպ» շքանշանով:

Եկեղեցական այս բարձր պարգևին արժանանալու համար իր երախտագիտությունը հայտնեց նաև Հարություն Արմենյանը՝ ի մասնավորի նշելով. «Այս շքանշանը չափազանց մեծ պատիվ է ինձ համար, բայց այս պարգևը կիսում եմ բոլոր նրանց հետ, որոնց հոգատարությունն ու խնամքը տեսել և շարունակում եմ տեսնել տարբեր երկրներում լինելու ընթացքում»:

Հանդիսությունը եզրափակվեց «Պահպանիչ» աղոթքով:

ՄԱՅՐ ԱԹՐՈՒ ՍՈՒՐԲ ԷԶՄԻԱԾՆԻ  
ՏԵՂԵԿԱՏՎԱԿԱՆ ՀԱՄԱԿԱՐԳ